



Adezaun Timor-Leste ba ASEAN: Dezafiu, Oportunidade no Implikasaun Seguransa

Mahein Nia Hanoin Nú. 18, 30 Setembru 2021



Foto: <https://youngsoutheastasianleaders.tumblr.com/>

Fundasaun Mahein (FM)
Website: www.fundasaunmahein.org
2021



Tabela Konteudu

| | |
|--|----|
| Sumariu ezekeativu | 3 |
| Introdusaun | 4 |
| Metodolojia | 5 |
| Rekzitus admisaun no obrigasaun ba karta magna ASEAN | 5 |
| Oportunidade no importansia Timor-Leste adezaun ba ASEAN | 11 |
| Dazafiu adezaun ba ASEAN | 13 |
| Implikasaun ba setor seguransa | 17 |
| Konkluzau | 21 |
| Rekomendasaun | 22 |
| Bibliografia | 23 |

Sumariu Ezekutivu

Adezaun ba ASEAN nu'udar kumprimisiu Estadu nian tuir Konstituisaun no PEDN nomos prioridade iha programa Governu nian. Esforsu Governu nia nivel nasional no rejional no resposta husi ASEAN nia maka hasa'e kapasidade tekniku. Iha nivel externa resposta Governu nia ba adezaun ASEAN presiza konserta liutan politika iha nivel kooperasaun bilateral no amizade ba iha estadu sira ASEAN. Iha ne'ebé ASEAN nu'udar vizinu imediata tenke sai prioriedade ba kondisaun hotu iha dezvoltimentu interna nian. Hodi konkretiza prinsipi sira amizade no kooperasaun iha politika externa, atu kaer metin ligasaun espesial ho pais viziñu sira no ho paiz sira iha rejiaun.

Timor-Leste tenke tau atensaun maka'as atu dezvoltolve nia kondisaun interna iha aspetu hotu-hotu liga ho pilar tolu ne'ebé ASEAN iha. Politikamente Timor-Leste preparadu atu sai membru ASEAN bainhira deit, maibe kuandu la preparadu ho kondisaun tekniku sira bele sai obstaklu boot ba dezvoltimentu nasional iha futuru sai membru ASEAN. Dezvoltimentu iha setor seguransa iha evolui tuir dezvoltimentu globalizasaun nian hodi responde ba ameasa ne'ebé kompleksu no organizadu. Obstaklu prinsipal Timor-Leste nia setór seguransa iha kondisaun ne'ebé frajil tebes atu responde ameasa hirak ne'e.

Durante ne'e Timor-Leste lakon oportunidade barak atu dezvoltolve nia setor seguransa. Iha sistema integradu seguransa nasional fo kbiit atu bele tratamentu ida ne'ebé integradu. Maibe dezvoltimentu kondisaun infraestrutura, fasilidade no rekursu umanu sei dook husi espetativa, no dezvoltimentu institucional ne'ebé la'o durante ne'e laiha balansu.

Rekomendasaun

1. Rekomenda ba Ministériu Negosiu Estranjeiru no Kooperasaun fortifika liña koodenasaun interministerial no intensifika asaun kolektiva iha prosesu adezaun ba ASEAN. Koodenasaun ida ho intensivu hodi dezvoltolve prespetiva hanesan Timor-Leste nia adezaun ba ASEAN.
2. Rekomenda ba Governu atu loke diskusaun nasional atu define prioridade sira atu elabora nia polítika externa no polítika seguransa nasional. Ministériu Negosiu Estranjeiru, Ministériu Defeza, Ministeriu Interior, ho Parlamentu Nasional nia koodenasaun.
3. Rekomenda ba Ministériu Defeza no Ministériu Interiór atu tau matan ba iha dezvoltimentu institusaun PNTL no F-FDTL iha rekursu umanu, fasilidade no infraestrutura. Nune'e mos ba Protesaun Sivil ne'ebé nu'udar entidade importante hodi responde krize dezastre naturais.
4. Rekomenda ba Ministériu Negosiu Estranjeiru no Kooperasaun atu fortifika diplomasia ho intensivu ho nasaun sira membru ASEAN. Diplomasia ne'ebé kualidade atu kore objesaun estadu membru ASEAN ba Timor-Leste nia adezaun.
5. Timor-Leste tenke kontinua promove reformas nacionais hodi aliña ho diretrizes ASEAN atu hatutan esforsus hotu-hotu atu Timor-Leste sai membru efetivu ho plenu direitu iha ASEAN. Nune'e presiza halo avaliasaun interna ba seguransa nasional tomak atu responde ba ASEAN iha pilar polítika-seguransa.

Introdusaun

Association of Southeast Asian Nations (ASEAN) nu'udar organizasaun rejionál ba sudeste Aziàtiku ne'ebé nia dezenvolvimentu dinamikú tebes. Estabelese iha loron 8 Agostu 1967 ho nia membru atual nasaun 10 husi rejiaun sudeste Aziàtiku. ASEAN sai forsa importante ida hodi hametin paz no estabilidade iha rejiaun. Iha admisaun membru foun identifikasaun rejionál sai kriteria primeiru husi kriteira prinsipal tolu seluk ne'ebé aplika iha karta magna ASEAN. Timor-Leste, nasaun kosteira ida iha sudeste aziátiku no iha tinan 2011 aplika ona prosesu kandidatura atu sai membru ASEAN. Kuaze estadu membru hotu hakarak Timor-Leste tama ona ba ASEAN. Maibe sei iha membru no fundadór balu rekuza tamba haree ba kondisaun domestika ne'ebé Timor-Leste dadaun ne'e konsidera bele sai obstaklu ba prosesu dezenvolvimentu ASEAN.¹

Nune'e dekada ida Timor-Leste hein atu sai membru permanente ASEAN. Durante iha prosesu adezaun Timor-Leste simu estatutu hanesan "bainaka espesial" ne'ebé ASEAN konvida partisipa iha realizasaun simeira no reuniaun sira ASEAN hala'o. Timor-Leste firme hakarak sai membru ASEAN nu'udar estadu independente ida iha rejiaun sudeste Aziàtiku ne'ebé iha rekezitus kona-bá admisaun membru foun ASEAN nia permite. Iha rekizitus ida husi rekizitus tolu seluk iha karta magna ASEAN, identifikasaun rejionál nu'udar vantajen ida ba Timor-Leste ne'ebé konsidera hanesan direitu ida ba nasaun sira ne'ebé partense iha rejiaun sudeste Aziàtiku atu hetan no mos Timor-Leste ne'ebé tama iha rejiaun ne'e. Portantu Timor-Leste hatan ba prosesu ida ne'ebé rigorozu tebes ba nia kandidatura atu sai membru ASEAN no durante tinan sanolu nia laran seidauk iha desizaun bainhira maka membru ASEAN sira aseita Timor-Leste nu'udar membru permanente ba organizasaun ne'e.

Istorkalmente desde tinan 1975 kumprimisiu atu sai membru ASEAN Timor-Leste hato'o nia vontade atu hamutuk iha ASEAN. Husi lider fundadór Estadu nia no depois restaurasaun independesia tau iha prioridade nasional. Iha polítika estadu nia hatuur iha Konstituisaun Repúblika Demokratika Timor-Leste (RDTL) no Planu Estratejiku Dezenvolvimentu Nasionál (PEDN), nomos sai perioriedade iha programa Governu nian. Polítika kooperasaun no relasaun externa Timor-Leste nia maka halo tuir valor no prinsipiu sira iha Konstituisaun RDTL atu kaer metin no defende solusaun pasifika ba konfliktu, hatún kilat jerál, simultáneu no kontroladu, harii sistema seguransa kolektiva no kria ba ordem ekonomika internasional foun ida ne'ebé bele kaer metin dame no justisa iha povu sira nia relasaun ba malu. Iha ne'ebé sai perioriedade ba Timor-Leste, hakarak atu kaer metin ligasaun espesial kona-bá amizade no kooperasaun ho pais viziñu sira no ho paiz sira iha rejiaun.²

Satisfasaun ba rekezitus sira ASEAN kondisaun interna sai sasukat importante atu bele adere ba ASEAN. Nune'e hahu tiha ona prosesu formal atu sai membru ASEAN hodi halo tuir karta magna ASEAN. Esforsu oin-oin Governu halo iha nivel rejionál no nasional, nomos resposta avaliasaun husi ASEAN. Iha aspeitu pilar polítika-seguransa nia durante ne'e Governu foka deit iha vantejen polítika hodi espalla iha ASEAN no seidauk fó atensaun ba kondisaun tekniku importante sira hodi hatan ba obrigasaun sira iha futuru

¹ Singapura no Laos mak sei iha objesaun ba integrasaun Timor-Leste nia ba ASEAN tamba ho razaun kondisaun politika no seguransa.

² Nú. 2, 3, Art. 8, Konstituisaun Repúblika Demokratika Timor-Leste, 2001.

adezaun ASEAN. Atu sai membru ASEAN prezisa atu hatene uluk ita nia-an didiak. Kestaun ne'ebé sei sai duvida ba ASEAN hodi lahamosu konsensu iha diskusaun Timor-Leste nia adezaun ba ASEAN. Preokupasaun sira ba kondisaun domestiku oin-oin iha dezenvolvimentu interna atu satisfas rekeztus sira no liga ba pilar tolu ASEAN nia, politika-seguransa, ekonomia, sosiu-kultura. Portantu ASEAN iha oportunidade ba Timor-Leste maibe Timor-Leste lakon oportunidade barak atu hadiak nia-an diak liu atu simu ASEAN ho dezafia husi empasse polítika ne'ebé naruk.

Nune'e prezisa tetu ho kle'an hodi fó resposta ba ASEAN ba dadaun ne'e Timor-Leste iha kondisaun preparadu atu sai membru ASEAN ka lae, hatan ba rekeztus admisaun no iha futuru atu responde ba obrigasaun sira nu'udar membru ASEAN. Timor-Leste la'os hein simu deit maibe pruntu atu oferese no iha kondisaun atu dezenvolve nia-an no moris tuir evolusaun dezenvolvimentu ASEAN. Iha diskusaun sira ne'ebé iha dalabarak foka deit ba nivel politika no igonora tiha iha pilar politika-seguransa ASEAN nian lahare kle'an oinsa iha setor seguransa Timor-Leste nia kuiñesementu no preparasaun kona-bá implikasaun tama ASEAN iha futuru ba sira nia servisu loro-loron nia.

Relatóriu ida ne'e sei deskreve informasaun konkreta sira ne'ebé ejiste kona-bá Timor-Leste nia progresu no possibilidade atu tama ASEAN ka lae no oinsa setor seguransa nia preparativus no implikasaun tama ASEAN iha futuru. Nune'e parte dahuluk husi relatóriu ida ne'e sei deskreve kona-bá rekeztus iha ASEAN nia ne'ebé aplika ba admisaun membru foun no obrigasaun sira atu kumpre nu'udar estadu membru. Parte daruak sei apresenta potencialidade Timor-Leste nia hodi kontribui iha futuru sai membru ASEAN no oportnidade sira. Parte datoluk levanta kona-bá dezafiu sira ne'ebé identifika sai nu'udar fatór ne'ebé implika ba iha prosesu adezaun ba ASEAN, no ikus implikasaun ba iha setor seguransa Timor-Leste ho opsaun sira atu hadiak.

Metodolojia

Prosesu inisiu husi peskiza ne'e nian liu husi revizaun ba literatura sira ka husi relatóriu ofisial sira estadu nian, peskiza no akademiku, nomos informasaun sira husi media ho diskusaun públiku sira ne'ebé ligadu ho adezaun Timor-Leste nia ba ASEAN husi prespetiva oin-oin, Governu no sociedade sivil sira. Hodi enkorpora prespetiva diferente hodi dezenvolve peskiza ne'e inklui entrevista ba ofisiais Governu nian, observadór nasonál sira no sociedade sivil. Nune'e hodi konklui relatóriu ida ne'e liu husi metodu ne'ebé Fundasaun Mahein (FM) adopta maka *Security Sector Discussion* (SSD) iha ne'ebé involve peskizador sira husi FM rasik no parte interesadu sira.

Rekztus admisaun no obrigasaun ba karta magna ASEAN

1. Rekeztus admisaun

ASEAN iha rekeztus formal ba admisaun membru foun ASEAN ne'ebé estadu kandidatura ida satisfas atu sai membru ASEAN. Wainhira priense kriteria hirak ne'e hotu bele sai hanesan baze fundamental maibe seidak garante atu bele tama ASEAN. Kuandu laiha esforsu diplomatiku ne'ebé bele suporta, no mós boa-fé husi estadu membru hotu ASEAN nia, luta atu sai membru permanente ASEAN susar atu bele atinje. Iha admisaun ba membru foun sei decide husi "desizaun konsensu" entre estadu membru

sira iha simeira nivel altu ASEAN bazeia ba rekomendasaun husi Konsellu Kordenasaun ASEAN (ACC). Nune'e Timor-Leste tama ona iha dekada ida hein ASEAN deside sai membru permanente ba asosiasaun estadu rejionál ne'ebé to'o ohin lora seidauk serteza.

Aplikasaun membru foun ASEAN bazeia ba kriteira sira hanesan; 1) identifkasaun jeografika ne'ebé rekuiñese iha Sudeste Asiatiku, 2) Tenke hetan rekuinesementu husi estadu membru hotu ASEAN nia, 3) aseita no pontu kumpre Magna Karta ASEAN, 4) iha abilidade no boa-vontade atu halo tuir obrigasaun nu'udar membru.³ Nune'e wainhira estadu ida hetan desizaun konsensu husi ASEAN hodi adere ba ASEAN, nia iha komitmentu atu aseita no prontu atu simu no halo tuir magna karta ASEAN. Estadu membru ASEAN tenke iha abilidade no boa-vontade atu halo obrigasaun nu'udar membru. Admisaun ba membru foun sei liu husi konsensu iha simeira altu nivel ASEAN ho rekomendasaun husi Konsellu Koordenasaun ASEAN (ACC). Estadu kandidatu ida admitidu iha ASEAN depois asinatura ba instrumentu adere ba karta magna.⁴

Haree husi kriterias sira ne'e Timor-Leste tama iha comunidade rejionál sudeste Aziátiku maibe seidauk sai membru ba assosiasaun estadu rejionál ne'e.⁵ ASEAN lasimu nasaun ne'ebé partense iha organizasaun rejionál seluk, hanesan ASEAN rejente ona Papua Nova Guine ne'ebé hakarak atu sai membru ASEAN⁶, no nasaun ida ne'ebé la'os partense iha area sudeste Aziátiku ne'ebé iha interese atu tama ba ASEAN. Wainhira Prezidente Filipina, Rodrigo Duterte iha forum "*Belt and Road*" iha tinan 2017 fo sai kona-bá elijibilidade Turki no Mongolia atu bele sai parte ida husi ASEAN, ne'ebé provoka diskusaun maka'as iha públiku. Turki no Mongolia la priense kriterias atu sai membru ASEAN tamba kriterias prinsipal partense ba lokalizasaun jeografia iha sudeste Aziátiku. Maske sira aseita ona ho TAC, no prezensa iha ARF bele konsidera tama parseiru sektoral nune'e sira klaru los labele konsidera atu bele sai membru ASEAN.⁷

Husi lisaun sira ne'e diferente ho Timor-Leste. Timor-Leste hato'o ona nia aplikasaun formal iha ba ASEAN iha tinan 2011 iha prezidencia rotativa annual Indonezia iha simeira nivel alto ASEAN ba dala-XVIII. ASEAN simu adezaun Timor-Leste tamba jeografia, jeopolitika no jeoekonomiku no merese sai membru ASEAN.⁸ Nune'e ASEAN hanesan forsa importante ida hodi hametin paz no estabilidade iha rejiaun. Identifikasaun rejionál maka kriteira prinsipal ka primeiru ne'ebé iha karta magna ASEAN, sai vantajen boot ba Timor-Leste⁹. Timor-Leste, nasaun kosteira ida iha sudeste Aziátiku, situadu entre vizinu rua ne'ebé boot tebe-tebes. Husi norte, oeste no leste iha arkipélagu indonézio. Iha Sul, kontinente Australianu ne'ebé boot no luan, besik kuaze 300 milhas náutikas, husi Tasi.¹⁰

³ Nú. 2, 1-4, artigu 6, Karta magna ASEAN, 2008.

⁴ Nú.3, 4 – Artigu 6, Magna karta ASEAN, 2008.

⁵ Boavida, João, Diretúr Ezekutivu CEPAD (2021, Agostu, 19) Entrevista Pesoa.

⁶ Ramos Horta, José, Eis Prezidente Repúblika (2021.Maiu. 25) – Intervensaun iha debate kona-ba Adezaun Timor-Leste ba ASEAN husi Geopolitika Rejional. Disponivel iha ne'e https://web.facebook.com/watch/live/?v=804293333853182&ref=watch_permalink

⁷ Academia Edu – What does it take to join ASEAN? Asesu iha lora... disponivel iha ne'e; https://www.academia.edu/33373196/What_does_it_take_to_join_ASEAN

⁸ KTT ASEAN Hasilkan 10 Kesepakatan Penting - <https://news.detik.com/berita/d-1635039/ktt-asean-hasilkan-10-kesepakatan-penting>

⁹ Art, 6, 2, (a), ASEAN Charter, Janeiro 2008.

¹⁰ Programa VIII Governu Konstitusional, Jullu 2018

Komesa husi 2002 Timor-Leste partisipa ona iha atividade ASEAN no tinan 2005 hola parte iha dialogu forum rejionál ASEAN (ARF) kona-bá promosaun pas no seguransa rejionál. Iha tinan 2007 adere ba tratadu amizade no kooperasaun (TAC). Maske hola parte ona ba akordu sira ne'e mos la garante, atu tama ASEAN ka lae. Portantu TAC la eksklusivamente ba nasaun sira ne'ebé partense rejiaun sudeste Aziàtiku no la garante katak nasaun sira ne'ebé asina TAC automatikamente tama ASEAN. Iha ne'ebé ARF no TAC aplika mos ba iha parseiru externa ASEAN. Historikamente nasaun sira ne'ebé tama uluk ba ASEAN hetan observadór uluk antes kompleta sai membru ASEAN. Maske antes ne'e ASEAN la ho baze legal ida.

Timor-Leste maka nasaun ida ne'ebé hetan prosesu ida ne'ebé rigoroza tebes, kuaze atu kumpre tomak ona ASEAN Charter ne'e. Maibe nia prosesu ba adezaun ne'e seidak termina no ASEAN laiha tempu ne'ebé serteza bainhira maka Timor-Leste sai membru permanente ASEAN. Wainhira Timor-Leste latama ASEAN, iha kestaun jeopolitika iha espasu boot iha influencia rejionál seluk, poder rai seluk bele forte mos iha no ne'ebé bele sai hanesan preokupasaun ba ASEAN.¹¹ Enkuantu latama ba ASEAN nu'udar estadu ida iha sekullu 21 ne'ebé iha interdenpendensia ekonomia, politika no sosial,¹² Timor-Leste lakon oportunidade husi benefisiu husi organizasaun rejionál ASEAN nia ne'ebé fó oportunidade atu kapasita nia dezenvolvimentu nasionál nune'e uluk Timor-Leste ejije maka'as atu sai lalais membru ASEAN, agora lalika ona ejije, kontinua deit relasaun ho rai seluk ne'ebé iha, hein bainhira mak ASEAN hakarak aprova Timor-Leste nia admisaun.¹³

Iha nasaun sira ne'ebé sai ba membru ASEAN hetan observadór uluk, depois deside sai membru ASEAN, maibe iha mos nasaun balu ne'ebé simu estatutu "observadór espesial", Papua Nova Guine, desde iha tinan 1967 no partisipa deit iha abertura simeira ASEAN no konsultasaun okazonál ASEAN nian.¹⁴ Timor-Leste la'os hanesan observadór, tinan tinan hetan konvite nu'udar hanesan *Guest honor* ka "Bainaka Espesial", ba nasaun ASEAN sira liu-liu ba ASEAN ne'ebé organiza eventu.¹⁵ Laiha klareza kona-bá estatutu hanesan "bainaka" nia implikasaun ba Timor-Leste atu sai membru permanente.

Iha tinan 1983, lideransa ASEAN sira konkorda katak estatutu observadór "tenke fó ba deit kandidatu potencia membru ASEAN ne'ebé priense kriteria ne'ebé define ba adezaun ASEAN". Observadór la'os parte husi dialogu no kooperasaun dezenvolvimentu ASEAN. Estatutu observadór la garante automatikamente admisaun ba ASEAN. Pedidu ba adezaun mos la garante automatikamente atu hetan estatutu orservadór, embora/maske nasaun sira CLMV hotu-hotu simu estatutu observadór durante hein sira nia kandidatu tama ba ASEAN. Pelu kontrariu Timor-Leste hato'o pedidu iha tinan 2011, to'o iha

¹¹ Da Costa, Fernando, Membru FONGTIL, (2021. Maiu. 25) – Intervensaun iha debate kona-ba Adezaun Timor-Leste ba ASEAN husi Geopolitika Rejional. Disponivel iha ne'e https://web.facebook.com/watch/live/?v=804293333853182&ref=watch_permalink

¹² Boavida, João, Diretúr Ezekutivu CEPAD (2021, Agostu, 19), Entrevista pesoal.

¹³ Belo, Nelson, Asessor seguransa no politika Ministeriu Prezidensial Konsellu Ministru, (2021, Agostu, 19), Entrevista pesoal.

¹⁴ Academia Edu, the Legal Battles of Timor-Leste ASEAN Membership Application. Asesu iha, 12/07 2021. Diponivel iha ne'e; https://www.academia.edu/38813789/The_Legal_Battles_of_Timor_Lestes_ASEAN_Membership_Application

¹⁵ Soares, Roberto, Vice Ministru Negosiu Estranjeiru no Kooperasaun (2015, Outubro 29). Intervensaun iha debate akdemiku kona-bá Adezaun ba ASEAN no Integrasaun Ekonomiku Rejional. Disponivel iha ne'e; <https://www.youtube.com/watch?v=f4NBtq3ILQk>

momentu ida ne'e la'os hanesan observador, no apenas bele partisipa deit sesaun abertura simeira ASEAN no reuniaun ministerial hanesan konvidadu. Atualmente Papua Nova Guine maka hanesan observador ba reuniaun sira ASEAN. Nasaun ne'e kaer ona estatutu observador especial desde 1967 maibe so partisipa deit serimonia abertura simeira ASEAN nomos realiza konsultasaun okazional ho nia parseiru ASEAN.¹⁶

Nune'e mos rekezitus formal konforme estabesidu iha dokumentu legais, no informal konforme estabesidu iha prinsipi filosofikus nia, kandidatu membru ASEAN ba dahuluk tenke hetan estatutu observador antes tama, no estatutu ne'e so bele fo deit ba kandidatu membru ASEAN ne'ebé priense kriteira ba membru ASEAN. Iha prova prinsipi jurisprudensia iha ASEAN, iha kazu Vietnam, Laos, Myanmar no Kamboja. Vietnam asina tratadu iha tinan 1992, simu estatutu observador iha 1992, no sai membru iha 1995. Enkuantu, Laos adere ba tratadu iha 1992, simu estatutu observador iha tinan 1992 no sai membru iha tinan 1997. Aliende ne'e, Myanmar adere ba tratadu iha tinan 1995 no sai membru iha 1997 hamutuk ho Laos. Ikus Kamboja sai membru ASEAN iha tinan 1999. Iha anteriormente simu estatutu observador iha 1995.¹⁷ Alende ne'e, Brunei Darusalam maka nasaun ida ne'ebé lakonsege identifika nia prosesu admisaun tamba hafoin deklarar nia independensia iha liu lora neen sai membru ASEAN, iha ne'ebé proklamasun independensia iha lora 1 Janieru 1984 no sai membru ASEAN iha lora 7 Janeiru 1984.¹⁸

Maske nune'e hanesan hatete ona iha leten simu estatutu observador ka konvidadu mos laklaru ba nasaun sira ne'ebé simu estatutu ne'e. Timor-Leste simu estatutu hanesan bainaka. Estatutu ba iha relasaun externa nia ne'e legalmente aplika husi karta magna ASEAN iha tinan 2007, no vigora iha janeiru 2008. Husi ne'e maka foin hahu ASEAN define estatutu ba realizasaun relasaun externa ASEAN nian. Realizasaun relasaun externa ASEAN nia, liu husi sorumutu entre Ministru Negosiu Estranjeiru nasaun ASEAN bele fo estatutu formal ruma ba parte externa sai hanesan; parseiru dialogu, parseiru dialogu sektorial, parseiru dezenvolvimentu, observador especial, konvidadu, ka estatutu seluk ne'ebé sei define tuir mai.¹⁹ Antes ne'e ASEAN estabese la ho baze legal ida hodi define estatutu ne'e, desde iha tinan 1967. Nune'e Timor-Leste tama ona ba dekada ida hein atu hetan estatutu membru permanente ASEAN tamba kestaun idetifikasaun rejional iha kriteria ASEAN nu'udar direitu ida ba Timor-Leste atu hetan.

2. Obrigasaun nu'udar membru ASEAN

Obrigasaun sai membru ASEAN maka pruntu atu aplika karta magna ho totalmente. Portantu hanesan hatete ona iha inisiu katak, Timor-Leste maka nasaun ida ne'ebé kumpre tiha ona obrigasaun hotu kuaze iha lei ASEAN nia, no buat balu ne'ebé ASEAN

¹⁶ Ibid

¹⁷ Academia Edu, The legal battles of Timor-Leste ASEAN membership application. Diponivel iha ne'e; https://www.academia.edu/38813789/The_Legal_Battles_of_Timor_Lestes_ASEAN_Membership_Application

¹⁸ Relatóriu FM (2016, Janeiru, 20), Esforsu no dezafiu adezaun Timor-Leste ba ASEAN "husi prespetiva pilar politika-seguransa no ekonómiku". MNL, nú.107. Disponivel iha ne'e; <http://www.fundasaunmahein.org/wp-content/uploads/2016/01/Microsoft-Word-MNL107-ASEAN-FINAL-20012016.pdf>

¹⁹ Nu 1, art, 44, ASEAN Charter, Janeiru 2008.

rasik nunka halo, maske seidak simu plenu direitu hanesan membru permanente. Hanesan nasaun ida ne'ebé iha komitmentu atu hamutuk estadu maluk sira iha rejiaun sudeste Aziátiku. Esforsu Governu nia hahu husi 2011 to'o 2015 mak; 1) Timor-Leste konsege konsolida nia dezenvolvimentu institusionál, la'os deit ba institusaun maibe mos rekursu umanus. 2) Halo programa sensebilizasaun iha nivel nasionál kona-bá nia vantajen no dezvantajen ASEAN ba kumunidade sira. 3) Halo estudu kompartivus atu haree avansa dezenvolvimentu iha ASEAN. 4) Estabelese mekanizmu propriu bazeia pilar tolu estabelese pontu fokal husi ministeriu hotu no agrupa tuir pilar tolu ASEAN. 5) Dezenvolvimentu ba rekursu umanus, formasaun no trenamentu ne'ebé koordena ho SEFOPE. 6 komunikasaun no koordenaun ho sosiedade sivil no setor privadu iha ambitu preparasaun adezaun ba ASEAN.²⁰ ASEAN rasik halo ona avaliasaun hodi konfirma esforsu no prontidasaun Timor-Leste nian hahu ho ASEAN Coordinations Council, Grupo Traballu ASEAN no kontinua ho ASEAN Fact Finding Mission²¹, maske rezultadu avaliasaun ne'e sai segredu ba Timor-Leste.

Nune'e kriteria admisaun ba membru foun ne'ebé ASEAN aplika ba Timor-Leste hamosu duvida. Timor-Leste hanesan nasaun ne'ebé hatan prosesu ASEAN nia ho rigorozu tebes. Devia ASEAN simu antes ona depois nia hatama nia aplikasaun formal, ne'ebé hatudu nia interese, no nu'udar direitu ida ne'ebé tenke hetan, tamba kriteria jeografiku. ASEAN ejije fali fali kestaun tekniku ne'ebé depois tama ASEAN maka bele rezolve, nu'udar programa ASEAN nia ne'ebé halo ba membru ASEAN, hanesan uluk halo ba Cambodia, Myanmar, Laos no Vietnam (CMLV). Tuir Ramos Horta katak lider sira iha ASEAN lahatudu vizaun klaru kona-bá Timor-Leste nia adezaun atu sai membru ASEAN. Lolos devia ASEAN simu Timor-Leste tama kedas tamba kriteia rejionál, iha laran tiha ona halo planu tinan lima tinan sanolu para oinsa Timor-Leste bele sai hanesan ekonomia ho rai sira seluk, la'os hein Timor-Leste preparadu tiha maka tama. Iha rejiaun sudeste Aziátiku no uniku Timor-Leste maka latama iha organizasaun rejionál ruma iha ne'ebé Timor-Leste iha direitu atu aseguara nia identidade rejionál, iha ASEAN.²²

Iha konstextu Timor-Leste, jeografia maka hanesan sita iha ASEAN nia kriteira importante mos oinsa atu aseguara nia membru foun. Iha kriteria haat ne'e maka sai sasukat atu avalia nasaun aspirante ida bele sai membru ka lae.²³ Ho kriteria identifikasaun jeografiku hanesan direitu ida ba Timor-Leste, maibe ho prosesu naruk ASEAN aplika hanesan

²⁰ Soares, Roberto, Vice Ministru Negosiu Estranjeiru no Kooperasaun (2015, Outubru 29). Intervensaun iha debate akademiku kona-bá Adezaun ba ASEAN no integrasaun ekonomiku rejional. Disponivel iha ne'e; <https://www.youtube.com/watch?v=f4NBtq3ILQk>

²¹ Tatoli, (Stembu 2019) – Vizita Fact Finding Mission ASEAN mai Timor-Leste foin primeira ves disponivel iha ne'e. <http://www.tatoli.tl/2019/09/27/vizita-fact-finding-mission-asean-mai-timor-leste-foin-primeraves/>

²² Ramos Horta, José, Eis Prezidente Repúblika (2015.Outubru. 29), Intervensaun iha debate kona-bá Adezaun Timor-Leste ba ASEAN no Integrasaun ekonomiku Rejional. Disponivel iha ne'e; <https://www.youtube.com/watch?v=f4NBtq3ILQk>

²³ Soares, Roberto, Vice Ministru Negosiu Estranjeiru no Kooperasaun (2015, Outubru 29). Intervensaun iha debate akademiku kona-bá adezaun ba ASEAN no integrasaun ekonomiku rejional. Disponivel iha ne'e; <https://www.youtube.com/watch?v=f4NBtq3ILQk>

tratamentu ida ne'ebé pozitivamente hanesan “deskriminasaun” husi ASEAN ba Timor-Leste nia prosesu admisaun membru.²⁴

Portantu iha obrigasaun sira ne'ebé sei kumpre nu'udar membru ASEAN. Tuir karta magna ASEAN nia define reuniaun oin-oin ne'ebé sei hala'o husi ASEAN ne'ebé ejije kapasidade estadu membru nia, iha rekursu ekonomia, infraestrutur, nomos rekursu umanu kualifikadu hodi hatan ba obrigasaun sira ASEAN nia. Nu'udar estadu membru Timor-Leste iha obrigasaun atu hala'o nune'e tenke prontu atu simu maibe tenke preparadu uluk antes ASEAN deside membru permanente ba Timor-Leste. Tuir mai iha kraik ne'e obrigasaun sira kona-bá membru ASEAN.

- Kada Konsellu Komunitade ASEAN (ACC) tenke hasoru malu (enkontru) ikus dala rua (2) iha tinan ida nia laran no sei lidera husi ministru ne'ebé apropriadu husi estadu membru ne'ebé kaer Prezidencia ASEAN. (Art. 9. nú 5 – Karta magna).
- Kada estadu membru tenke hatudu nia representasaun nasionál ba kada reuniaun ACC. (Art. 9, 3).
- Kada estadu membru ba ASEAN foti nia ema ida hanesan representate permanente ba ASEAN ho postu embaixador ba tuur iha Jakarta, nuudar komite permanente representativu ba ASEAN (Art, 12. Nu,1) ²⁵
- Kada estadu membru hotu obligatoriumente tenke estabelese nia sekretariadu nasionál ne'ebé dever atu; a) servi ba pontu fokal nasionál, b) sira hanesan repsitóriu informasaun kona-bá problema hotu ASEAN iha nivel nasional, c) koordena nia ba implementasaun dezisaun husi ASEAN nia iha nivel nasional, e) koordena no apoiu ba preparativu nasionál reuniaun ASEAN, f) promove identidade no konsensializasaun ASEAN iha nivel nasional, g) fo kontribuisaun ba desenvolvimentu komunitade ASEAN. Sekretariadu Nasional ASEAN (Art, 13).
- Orsamentu operacional sekretariadu ASEAN tenke kobertura husi estadu membru hotu liu husi kontribusaun annual ne'ebe hatama tuir tempu oportunu. (art, 30, nu 2).
- Prezidente ASEAN halo rotasaun kada tinan bazeia ba ordem alfabetika naran iha lian ingles husi nasaun membru. (Art, 31, nu 2).
- Reuniaun ASEAN kuaze besik atus tolu ne'ebé akontese kada tinan, ne'ebé ruduz ona husi rihun ida. Ne'ebé bele diskute iha tipu oin-oin no liga ba pilar tolu ASEAN nian, hanesan politika-seguransa, ekonomia, no sosiu-kultura.
- Iha reuniaun liga ho pilar politika-seguransa ne'ebé akontese maizumenus sia nolu enkontru kada tinan.
- ASEAN no estadu membru obligatoriu atu kaer metin protokolu no pratika sira diplomatiku nian ne'ebé iha realizasaun atividade hotu ne'ebé ligasaun ho ASEAN. (art. 33, a)
- Nune'e mos ASEAN nia prinsipiu la interfere ba asuntu interna no foti dezisasaun iha ASEAN bazeia konsultasaun no konsensu, iha simeira nivel alto ASEAN nia (Art,20).

²⁴ Magno, Adaljiza, Ministra Negosiu Estranjeiru no Kooperasaun (2020, Dezembru, 21) – Resposta iha debate adezaun Timor-Leste ba ASEAN iha PN. Disponivel iha ne'e <https://www.youtube.com/watch?v=E6NMjYyRIs0>

²⁵ Timor-Leste, iha tinan 2019 Governu liu husi MNEK haruka ofisial ligasaun ba Sekretariadu ASEAN Jakarta. Autu fosilita komunikasaun ida entre Governu Timor-Leste ho ASEAN liga ho atualizasaun preparativus tekniku sira ne'ebé Timor-Leste halo hodi adere ba ASEAN.

Timor-Leste implementasaun dadaun ona iha nia atividade sira ne'ebé relasiona ho ASEAN, hanesan kondisaun iha nivel interna Governu estabelese responde ba prosesu adezaun ba ASEAN. Nune'e Timor-Leste hatudu ona nia komitmentu no esforsu atu adere ba ASEAN, no agora fila fali mos ba nasaun membru sira iha ASEAN hakarak atu akumula Timor-Leste sai membru ASEAN ka lae, resposta ne'e ASEAN mak bele fó. Komesa husi tinan 2014 ASEAN halo avalaisaun atu identifika progresu no prontidaun liu husi grupu traballu ASEAN, no kontinua iha tinan 2019 iha lideransa Malazia nia ASEAN mai fali ho *Fuct Finding Mission* verifika progresu husi rezultadu avaliasaun ne'ebé halo ona relasiona ho preparasaun Timor-Leste ba adezaun ASEAN, maske rezultadu avaliasaun ne'e sai hanesan segredu ba Timor-Leste. Haktuir ba iha artigu 20, Magna Karta ASEAN, kona-ba dezisaun ASEAN maka iha "konsultasaun no konsensu" ne'ebé realiza liu husi reuniaun altu nivel ASEAN.²⁶

Oportunidade no importansia Timor-Leste Adezaun ba ASEAN

Timor-Leste nasaun ida ne'ebé tane a'as demokrasia no diretus umanus ne'ebé hatudu ba mundu nomos liu-liu iha rejiaun laran ASEAN. Pais post konflitu ida ne'ebé tempu badak deit konsege transforma an ba multi partidarizmu, involve sidadaun hotu hato'o sira nia opiniaun, sira hanoin livremente iha prosesu harii Estadu no nasaun. Prinsipiu importante ne'ebé bele kontribui ba ASEAN hanesan mós direitus umanus iha ASEAN, uniku Timor-Leste maka ratifika hotu kedas konvensaun internacional kona-bá direitus umanus. Ne'e hatudu katak ita tu'ur ho nasaun sira ne'ebé nasaun sira seluk ne'ebé maka promove demokrasia, justisa no direitus umanus.²⁷

Haree husi esperensia iha kontestu demokrasia Timor-Leste seidak iha prozisioneriu politiku, media livre espresa no sidadaun sira protestu livre, organizadu no regula ho diak.²⁸ Nune'e kestaun politika-seguransa laiha problema. Timor-Leste iha esperensia iha g7+, sai nasaun ne'ebé demokratiku ne'ebé bele sai referencia ba ASEAN.²⁹ Iha liberdade espresaun no uniku iha Timor-Leste sociedade sivil bele tur hamutuk hanesan ho ukun na'in sira, bele ko'alia direita ba malu, ne'ebé akontese loro-loron. Nu'udar sasin ida ne'ebé hato'o husi konferensia sociedade sivil ASEAN iha tinan 2016. Tempu ne'ebé Timor-Leste hola responsabilidade atu realiza atividade ASEAN ne'e tamba Laos nia kondisaun ba liberdade espresaun la permite atu bele sai uma nain. Ikus husi konferensia ne'e sociedade sivil sira husi ASEAN sira espresa buat ida ne'ebé diferente husi nasaun sira seluk, tamba iha rai seluk sira tenke supreviziona ho polisia no militar, sira ladun kontente maka ho diretus umanus, maibe iha ne'e, nakloke liu, lider sira ko'alia ho sira,

²⁶ Article 20, no 1, 2 – THE ASEAN Charter, January 2008. Disponivel iha ne'e; <https://web.archive.org/web/20150923185415/http://www.asean.org/images/2012/publications/ASEAN-Charter.pdf>

²⁷ Soares, Roberto, Vice Ministru Negosiu Estranjeiru no Kooperasaun (2015, Outubro 29). Intervensaun iha debate akdemiku kona-bá adezaun ba ASEAN no integrasaun ekonomiku rejional. Disponivel iha ne'e; <https://www.youtube.com/watch?v=f4NBtq3ILQk>

²⁸ Belo, Nelson, Asessor seguransa no politika Ministeriu Prezidensial Konsellu Ministru, (2021, Agostu, 19), Entrevista pesoal.

²⁹ Boavida, João, Diretúr Ezekutivu CEPAD (2021, Agostu, 19), Entrevista pesoal.

nee hanesan buat ida ne'ebé sei lahare akontese nasaun sira seluk iha ASEAN nia laran.³⁰

Prinsipiu ida iha komunidadade ASEAN nia maka promove paz no estabilidade iha rejuan atu bele garante dezvoltimentu ne'ebé sustentavel ba komunidadade ASEAN. Nune'e dalan ida maka iha kapasidade atu promove dialogu no rezolusaun ba konfliktu sira ne'ebé akontese iha rai laran no mos ho nasaun vizinu sira. Esperiensia ida ne'ebé Timor-Leste ho Indonezia atinje kona-bá Rekonsiliaun. Sai hanesan kapital politika ba Timor-Leste liga ba vizaun politika ASEAN kona-bá promosaun pas no estabilidade rejional sai indikadór promosaun paz no estabilidade rejional partikulamente iha rejiaun ASEAN. Istoría nakukun pasadu funu no konfliktu ne'ebé transforma sai enerjia pozitivu.³¹ Nune'e nasaun sira harii komunidadade ida ne'ebé iha harmonia, harii amizade no kooperasaun ba dezvoltimentu sustentavel ba komunidadade ASEAN ne'ebé sai hanesan pasu pozitivu ida.

Alende kona-bá rekonsiliaun sai modellu ba mundu hanesan uzu interna hodi garante estabilidade politika no seguransa iha rai laran. Prova ne'ebé iha, Timor-Leste infrenta "krize politika no militar iha tinan 2006 halo ONU inklui nasaun sira iha ASEAN preokupa. Fundador ASEAN balu sempre halo objesaun ba Timor-Leste nia adezaun sai membru ASEAN tamba haree ba kotuk ho problema Timor-Leste iha pasadu no post independensia. Duvida hirak ne'e, la'os ona sai kestaun ba Timor-Leste ne'ebé sidadaun sira goza liderdade no moris iha harmonia, maske Governu tenke responde maka'as hodi tau matan ba dezvoltimentu seguransa umanu. Timor-Leste iha mekanizmu rezolusaun konfliktu ne'ebé uniku, iha ne'ebé uza kombinasun entre instituisaun formal no naun formal sira atu rezolve problema ne'ebé akontese. Iha ne'e, papel instituisaun informal hanesan pratika tradisional no Igreja sai hanesan "segundu melhór instituisaun" ne'ebé fó seguru, protesun, no mekanizmu rezolusaun konfliktu ba povu Timor-Leste. Instituisaun informal rua ne'e hatudu ona kapasidade atu haforsa (komplementaridade) no dalaruma troka (subtitui) papel PNTL no F-FDTL no instituisaun judisiariu ba forneselementu seguransa ba povu Timor-Leste. Papel seguransa tônika ne'e halo populasaun sira sente seguru liu. Iha esperiensia barak ne'ebé hatudu mekanizmu sira ne'e aplikavel rezolve konfliktu sira ne'ebé akontese husi nivel baixu to'o krize boot, exemplu kazu krize politika militar 2006.³²

Iha sorin seluk iha oportunidade ba ASEAN iha Timor-Leste nia adezaun atu habelar nia pozisaun iha kontinente hotu iha mundu. Timor-Leste hanesan membru CPLP, organizasaun ida ne'ebé uniku iha mundu iha kontinente Azia, Afrika, Europa no Amerika. ASEAN bele uza Timor-Leste hanesan ponte liga ba Europa, Amerika no Afrika – bainhira Timor-Leste hola parte nu'udar membru ASEAN iha futuro. Maske nune'e, Timor-Leste tenke prepara-an diak liutan hodi hadia mekanizmu interna liga ho pilar tolu ASEAN nian

³⁰ Da Costa, Fernando, Membru FONGTIL (2021.Maiu. 25) – Intervensaun iha debate kona-ba adezaun Timor-Leste ba ASEAN husi Geopolitika rejional. Disponivel iha ne'e https://web.facebook.com/watch/live/?v=804293333853182&ref=watch_permalink

³¹ Sholeh, Badrus (2013) - Membangun Hubungan Damai Indonesia dan Timor-Leste: Kerjasama Negara dan Masyarakat Sipil.

³² Peran institusi informal dalam sektor keamanan di Timor-Leste disponivel iha ne'e; <https://s3pi.umy.ac.id/peran-institusi-informal-dalam-sektor-keamanan-di-timor-leste-tahun-2000-2012/>

antes halo interaksan iha komidade ASEAN. Tama ASEAN la'os prosesu ida ne'ebé fasil no entantu luta ida la'os deit ba kestaun juridiku ka kriteira ne'ebé ASEAN husu ba Timor-Leste. Iha sasukat internal ne'e sempre haree liu iha kestaun nivel politika no dalabarak Governu iha dezvoltimentu ignora tiha iha kestaun tekniku sira ne'ebé importante liu ba ASEAN sai nu'udar benefisiu no dezafiu wainhira sai membru permanente.

Benefisiu ba Timor-Leste bainhira sai membru ASEAN- nasaun liu husi ligasaun ne'ebé diak liu iha ASEAN sira sei fó apoiu tekniku, sira bele fahe sira nia esperiensa ho Timor-Leste oinsa bele hamenus birokrasia, liu husi dezvoltolve sistema diak liu. Iha oportunidade barak liutan ne'ebé atu dezvoltolve institusaun setor seguransa nian. Iha ne'ebé Timor-Leste hanesan nasaun foun ida ne'ebé nia instituisaun sira setór seguransa nia sei menus dezvoltimentu iha rekursu, facilidade no infraestrutura.

Dazafiu Adezaun ba ASEAN

1. ASEAN seidauk iha konsensus

Ekstensaun diskusaun adezaun Timor-Leste nia ba ASEAN la'o hahu iha tinan 2015, tempu ne'ebé razaun husi ASEAN katak muda-an ba Komidade ASEAN nune'e adezaun admisaun membru foun impede prosesu transformasaun komidade ASEAN nia.³³ ASEAN hahu estabese grupu traballu ASEAN atu halo avaliasaun ba prontidaun Timor-Leste komesa 2014, maske rezultadu avaliasaun ne'e sai segredu ba Timor-Leste. Iha reuniaun Ministeriu Negosiu Estranjeiru ASEAN nia ba dala-52 iha Bangkok Tailandia, Ministru externa sira husu estadu membru ASEAN fó ona atensaun ba Timor-Leste nia pedidu ba ASEAN. ASEAN delega misaun deskobrementu faktu ka *Fact Finding Mission* halo planu atu hatudu progresu halo iha konsiderasaun ba pedidu Timor-Leste nia atu sai membru ASEAN.³⁴ Nune'e to'o iha reuniaun ba Ministeriu Negosiu Estranjeiru ASEAN ba 54, lora 2 Agostu 2021 liu husi videoconference, ne'ebé lidera husi prezidensia Brunei Darussalam. ASEAN reafirma komitmentu no kontinua buka tuir progresu husi preparasaun ba pilar ekonomia ASEAN (AEC) no pilar sosiu kultura (ASCC) husi misaun deskoberta faktu ba Timor-Leste. Komprimisiu husi ASEAN nia maka kontinua mellora apoiu forma prestasaun kapasidade ba Timor-Leste, partikular liu husi partisipasaun ne'ebé iha la'os foti-dezisaun iha ASEAN.³⁵

Dezafiu seluk ne'ebé identifika maka tama ASEAN sei hasoru kondisaun domestika oinoin ne'ebé konsidera seidauk viavel. Globalizasaun ekonomiku, estabilidade politika no seguransa ne'ebé sai hanesan duvida ne'ebé dada naruk tempu Timor-Leste atu adere ba ASEAN. Portantu identifikaun rejional Timor-Leste otomatikamente tama iha rejiaun

³³ Relatório FM (2016, Janeiro, 20), Esforsu no dezafiu adezaun Timor-Leste ba ASEAN "husi prespetiva pilar politika-seguransa no Ekonómiku". MNL, nú.107. Disponivel iha ne'e; <http://www.fundasaunmahein.org/wp-content/uploads/2016/01/Microsoft-Word-MNL107-ASEAN-FINAL-20012016.pdf>

³⁴ Komunidade Imprensa ASEAN (2019, Jullu, 31), Sita iha paragrafu 74, Disponivel iha ne'e; <https://reliefweb.int/sites/reliefweb.int/files/resources/CIRCULATE-Joint-Communique-of-the-52nd-AMM-FINAL.pdf>

³⁵ Komunidade Imprensa ASEAN (2021, Agostu, 02) – Pedidu Timor-Leste atu sai membru ASEAN sita iha paragrafu 88. Disponivel iha ne'e; <https://asean.org/storage/Joint-Communique-of-the-54th-ASEAN-Foreign-Ministers-Meeting-FINAL.pdf>

sudeste Aziàtiku, maibe seidauk tama iha asosiasaun estadu rejionál ka ASEAN. Nune'e sai hanesan luta ida ne'ebé Timor-Leste tenke halo maka oinsa atu konvense estadu membru ASEAN atu lori Timor-Leste tama ba ASEAN. Iha ne'ebé ASEAN rasik iha kriteria prinsipal haat ba admisaun membru foun. Husi kriteria ida husi hat ne'e maka kona-bá aseitasaun husi ASEAN. Haree ba kondisaun interna liga ba iha politika-seguransa, ekonomiku, sosiu-kultura, Timor-Leste bele ka lae iha kondisaun atu sai membru ASEAN. Iha pontu ida ne'ebé sai duvida ho nasaun membru sira ASEAN balu bele aseita bele mos membru sira seluk rekuza, la aseita tama ho kondisaun interna liu husi avaliasaun ne'ebé identifika.

Timor-Leste bele satisfas kriteria rejionál/jeografiku maibe kriteria seluk kona-bá aseitasaun husi ASEAN no laiha dezisaun konsensu sei la sai membru ASEAN. Iha ne'ebé iha politika ASEAN nian, Estadu kandidatura ida sai membru ASEAN tenke hetan aseitasaun husi ASEAN liu husi dezisaun konsensu. Iha ne'ebé ASEAN mai razaun katak Timor-Leste seidauk preparadu atu tama ASEAN. Portantu Singapura maka iha objesaun ba Timor-Leste nia adezaun ba ASEAN, ho opiniaun katak Timor-Leste "seidauk pruntu" atu halo adaptasaun ba dezafiu ho tipu oin-oin ho kompleksidade adezaun ne'e existe iha ASEAN. Objesaun Singapura ho argumentu katak Timor-Leste simu barak ajudus externa ne'ebé la realiza iha forma ba la ho fundus ne'ebé barak liu Timor-Leste simu. Iha ne'e konsidera nu'udar tipu oin-oin "intervensaun" fora husi sudeste Aziàtiku ne'ebé simu husi Timor-Leste.³⁶ Maske haree momos katak Singapura nia duvida ne'e ladun fundamentu tamba la separa asuntu interna ho kriteria ASEAN. Iha ne'ebé kriteria importante liu numeru ida maka identifikaun jeografiku hanesan direitu ida Timor-Leste, no laos hanesan kriteria organizasaun rejionál seluk hanesan Uniaun Eropa ne'ebé tau fó importansia ba kriteria demokrasia, justica no direitus umanus.³⁷ Maske nune'e ASEAN tane dezisaun kolektiva, katak wainhira estadu membru ASEAN ida sei iha rezerva ba dezisaun ne'e signika seidauk iha konsensu.

2. Dezenvolvimentu polítika interna

"Bainhira dezafiu ne'e la rezolve hodi diak maka hakarak dudu bei-beik prosesu atu halo parte ASEAN maka dezafiu ne'e aumenta tan bei-beik ona. Tama ba ASEAN ne'e hanesan opotunidade ida maibe Timor-Leste mos lakon opotunidade tamba iha Governu rua, VII Governu iha nia mandatu la to'o rohan, no forma fila fali VIII Governu Konstituisional ne'ebé existe iha deit Governu de Jestaun la'os Governu ida halo dezenvolvimentu." (Joao Boavida, Diretor Executivo CEPAD)

Sai membru ASEAN husi prosesu ne'ebé iha tuir istoria katak ne'e sai kumprimisiu polítika estadu nia ne'ebé hato'o desde 1975. Timor-Leste hakarak adere ba ASEAN nu'udar perioriedade estadu iha polítika negosiu estranjeiru Timor-Leste nian no halo ona esforsu barak atu satisfas ba kriteriu sai membru ASEAN hodi reponde ba obrigasaun nu'udar Estadu membru. Nune'e priense rekezitus sira, kondisaun interna sai sasukat ida

³⁶ Universitas Kristen Setya Wacana. (2019). Dinamika masuknya Timor-Leste untuk mendapatkan status keanggotaan penuh dalam ASEAN. Disponivel iha

<https://repository.uksw.edu/handle/123456789/19435>

³⁷ Ramos Horta, José, Eis Prezidente República (2015.Outubro. 29) – Intervensaun iha debate kona-ba adezaun Timor-Leste ba ASEAN no integrasaun ekonómiku rejional. Disponivel iha ne'e <https://www.youtube.com/watch?v=f4NBtq3ILQk>

atu bele konvense membru ASEAN atu simu Timor-Leste nia adezaun ba ASEAN. Maske kriteira ne'ebé prinsipal liu maka kriteriu jeografiku maibe nu'udar kondisaun ida ba iha organizasaun rejional sira aplika ho mos atu la'o tuir ba dinamiku dezenvolvimentu organizasaun ne'e rasik.

Bainhira dezafiu ne'e la rezolve hodi diak maka hakarak dudu bei-beik prosesu atu halo parte ASEAN maka dezafiu ne'e aumenta ba bei-beik. Iha ne'ebé durante tinan rua nia laran no depois pandemia Timor-Leste lakon oportunidade atu dezenvolve nia an iha aspeitu ekonomia, sosial no politika atu hatuur Timor-Leste iha pozisaun ida diak atu bele konvense membru ASEAN no prontu ona atu integra-an iha ASEAN.

Nu'udar organizasaun ne'ebé nia dezenvolvimentu ne'e la'o kleur ona, ASEAN bainhira atu simu membru foun nia sei haree, serake membru ne'e mai atu lori organizasaun ne'e la'o ba oin ka halo fila fali organizasaun sai todan atu hakat ba oin. Ida ne'e kestaun ne'ebé sai duvida no ASEAN rasik maka tenke halo avalaisaun. Husi rezultadu avaliasaun ne'e mak bele konklui katak estadu kandidatura ida ne'e bele ona sai membru ASEAN ka la'e, iha futuru atu hetan estatutu sai membru permanente ASEAN. Avaliasaun husi ASEAN ba Timor-Leste tuir dezenvolvimentu pilar tolu iha hanesan pilar Politika-Seguransa, Ekonomia, no Sosiu-kultura. Komesa husi tinan 2014 no Timor-Leste ne'ebé iha ambisaun atu sai membru ASEAN iha tinan 2015, tempu ne'e ASEAN muda-an ba Komunidade ASEAN. Lakonsege tan sai membru ASEAN iha tinan 2019. Prosesu kandidatura atu sai membru ASEAN iha tinan 10 nia Timor-Leste hetan deit resposta ne'ebé ASEAN fó maka apoiu tekniku ba Timor-Leste atu mellora liutan nia kapasidade hodi prepara an diak liutan atu sai membru ASEAN.³⁸

Adezaun ba ASEAN wainhira ho kondisaun ida ne'ebé la preparadu sei hasoru dezafiu oin-oin. Tamba sei hatan ba obrigasaun ne'ebé membru ASEAN sira simu no tenke prontu halo tuir. Timor-Leste nu'udar membru ASEAN bele ka lae hatan ba ne'eba. Tamba ne'e sei mai ho kondisaun oin-oin iha obrigasaun nu'udar membru. Susar oituan, Timor-Leste dadaun ne'e atu satisfas kriteira tolu husi haat ne'ebé ASEAN fó tamba defaktu Timor-Leste iha pozisaun ida desvantajoza katak pozisaun ida ladun tasak didiak atu hatuur Timor-Leste nu'udar membru ASEAN. Iha periodu pandemia Covid-19 ne'ebé ita hasoru susar oituan tamba mós ho kestaun iha Governasaun. Tuir lolos Timor-Leste iha oportunidade barak atu hadiak nia-an atu simu ASEAN antes pandemia iha tinan 2019 maibe la konsege tama. Ho periodu pandemia ne'e susar liutan, sei ita tama ASEAN atu túr hanesan membru ho nasaun sira seluk iha ASEAN iha meja kabuar ida, ka atu hamriik aas hanesan ho ASEAN sira seluk.³⁹

Maske nune'e hare ba kondisaun interna liga ba pilar politika-seguransa iha ASEAN, iha kazu Timor-Leste politikakamente laiha problema. Referensia g7+ Timor-Leste to'o ohin loron ema rekuinese nasaun ida demokratiku, nasaun ida hakamatek iha paz, nasaun ida bele sai mos referensia nasaun sira seluk halo parte iha g7+. Referensia politika, Timor-Leste sai membru ASEAN maizumenus politika externa TL nia sei la'o tuir politika g7+, so

³⁸ Komunikadu Konjunta, Reuniaun Ministru Negosiu Estranjeiru ASEAN (2021, Jullu, 31) - Paragrafu 88. Disponivel iha ne'e; <https://asean.org/storage/Joint-Communique-of-the-54th-ASEAN-Foreign-Ministers-Meeting-FINAL.pdf>

³⁹ Boavida, João, Diretúr Ezekutivu CEPAD (2021, Agostu, 19), Entrevista pesoal.

ke membru sira iha ASEAN lahanesan membru sira g7+, ASEAN dezenvolidu duni, ekonomikamente, sosialmente, politikamente teknolojikamentu membru sira ASEAN nian ne'e super dezenvolidu, kompara ho g7+.

Ida ne'e dezvantajen ida ba Timor-Leste, maske Timor-Leste nia politika externa ne'e diak maibe la reflète ba politika interna dezenvolvimentu ba povu Timor nia. Politika externa iha palku internasional ne'ebé ema respeitu defaktu, demokrasia, rekonsiliaun iha nivel internasionál. Maibe kuandu haree ba realidade saida maka prega iha kumunidade internasional la reflète iha rai laran. Dezenvolvimentu lala'o hanesan saida maka ita hakilar ba iha rai liur.

Iha sorin seluk, politika ba setór seguransa Timor-Leste preparadu atu atu sai membru ASEAN, maibe dezenvolvimentu interna empase politika ne'ebé paralizadu tiha nia dezenvolvimentu. Timor-Leste la'os tenke preparadu hotu maka tama ba ASEAN, iha kondisaun balu ne'ebé presiza hadia, kontinua hakat no bele kompleta iha ASEAN⁴⁰. Kestaun normal iha prosesu adezaun ba Organizasaun rejionál, ASEAN iha mós dever atu tulun nasaun ida ne'ebé sai membru ASEAN ajuda atu bele dezenvolve nia an atu la'o tuir dinamika dezenvolvimentu ne'ebé la'o iha ASEAN.⁴¹

Oinsa maka Timor-Leste dezenvolve nia-an tuir evolusaun no dezenvolvimentu iha ASEAN. Menus esperensia iha diplomasia sai fatór ida lobi ho estadu membru sira ASEAN nian, no suporta ho informasaun sira ne'ebé suficiente atu konvense estadu membru ASEAN kona-bá potencialidade Timor-Leste nia adezaun ba ASEAN. Ministeriu Negosiu Estranjeiru no Kooperasaun (MNEK) indika buat tolu ne'eb'e sai dezafiu iha prosesu adezaun ba ASEAN nia, intermuz luta diplomatiku. Maske Timor-Leste halo ona esforsu oin-oin ho kuaze estabelese ona embaixada sira iha estadu membru ASEAN tomak maibe presiza haforte liutan diplomasia ba iha ASEAN ho potencia ideolojiku ekonomiku, politika-seguransa, no sosiu kultura ho evidencia forte realidade dezenvolvimentu interna. Iha ne'ebé durante tinan rua nia laran MNEK identifika fatór tolu mak hanesan, 1) Diplomasia ne'ebé durante ne'e halo seidauk forte atu bele konvense ema. 2) Ita seidauk bele konvenese ema ho ita nia potencia ideolojiku intermus ekonomiku viavel atu tama iha ASEAN, 3). Informasaun ne'ebé fó ba ASEAN seidauk sifisiente.⁴² Nune'e Timor-Leste tenke halo diplomasia ida ne'ebé la'os deit intensivu maibe efetivu hodi influencia nasaun sira ASEAN nia iha kamada hotu atraves enkontu no seminar, no konferensia iha nasaun sira hodi hatudu katak Timor-Leste iha kapasidade duni no sei la sai todan ba ASEAN iha futuru.

Entretantu Timor-Leste sei falta polítika iha dezenvolvimentu interna ne'ebé sai nu'udar fatór ida importante ba ASEAN. Dezafiu ida, aspeitu polítika no seguransa ne'e to'o agora seidauk iha *white paper* ba politika esterna nian. Importansia iha polítika externa nia atu

⁴⁰ Belo, Nelson, Asessor seguransa no politika Ministru Prezidensial Konsellu Ministru, (2021, Agostu, 19), Entrevista pesoal.

⁴¹ Ramos Horta, José, Eis Prezidente República (2021.Maiu. 25) – Intervensaun ida debate kona-ba Adezaun Timor-Leste ba ASEAN husi Geopolitika Rejional. Disponivel iha ne'e https://web.facebook.com/watch/live/?v=804293333853182&ref=watch_permalink

⁴² Babo, Deonísio, Eis Ministru Negosiu Estratejeiru no Kooperasaun, (2020, Novembru, 18) Entrevista iha Programa futuru diplomatiku husi TVE Timor. Disponivel iha ne'e; <https://www.youtube.com/watch?v=sO3vMVZna7w>

nasaun ida identifika an ba iha orgaizasaun rejionál hanesan ASEAN maka liu husi nia polítika ne'e rasik. Tamba ne'e membru ASEAN seidak iha konfiansa ba ita atu tama ASEAN nian. ASEAN lahatene Timor-Leste nia polítika externa ne'e la'o ba iha ne'ebé. Fatór ida ne'ebé bele sai determinante ba ita nia adezaun ba organizasaun sira rejionál nian. Ita nia polítika externa ne'e laklaru. Timor-Leste hatudu nia prontindaun ba ASEAN maibe oinsa maka ASEAN bele kuiñese interese estratéjiku Timor-Leste ba iha ASEAN. "Buat ne'ebé atu fó hatene ba ema kona-bá ita nia interese ba iha organizasaun rejionál, hanesan ASEAN maka liu husi ita nia polítika ne'e rasik. Ida maka politika externa ne'e, Politika seguransa nasional, politika defeza nasional, ida maka seguransa interna. Politika ne'ebé orienta ita nia rezultadu. Tamba wainhira ita laiha politika ne'ebé klaru, susar ba ema atu haree hetan dalan ne'ebé ita liu atu ba ASEAN."⁴³

Implikasaun ba setor seguransa

1. Responde ba kompleksidade ameasa

"Hau onestu deit tantu PNTL no F-FDTL atu tama ba ASEAN ne'e ita seidak iha preparasaun suficiente intermus formasaun, treinamentu balu iha ona seidak to'o no presiza liután formasaun kapasita didi'ak ita nia ofisial sira metin didiak maka ita ba ne'e kapas liu" (Filomeno da Paixão, Ministru defeza no Seguransa, 2019)⁴⁴

Buat ne'ebé sai preokupante mós Timor-Leste atu hare didiak kona-bá kompleksidade sira iha setór seguransa iha ASEAN. ASEAN organizasaun ida ne'ebé nia dezvoltimentu dinamiku tebes. Iha tempu hanesan mosu kompleksidade oin-oin iha ameasa iha setór seguransa. Haree husi jeopolitika kondisaun nasaun sira iha sudeste aziatiku vulneravel tebes atu akontese konflitu tamba ho pozisaun ne'ebé besik malu los. Aleinde ne'e tendensia ba konflitu bilateral no multilateral kada ves mais susar atu ses an. Iha ne'ebé dezvoltimente ba pais sira iha ASEAN ne'e agora la'os ona hatauk husi inimigu esterna maibe barak provoka husi problema interna hanesan movimentu separatista no demokratizasaun, nomos krime organizadu transnasionál sira.⁴⁵

Iha servisu PNTL nia tama iha rejaun ASEAN mezmú ita iha difikuldade barak maibe Polisia iha ASEAN Timor-Leste tama iha kategoria numeru 3 tuir Global Police Index 2019. Rangkin ida ne'e sukat husi PNTL nia atuasaun ba prevensaun ba krime, manutensaun ba ordem publiku no servisu polisiamentu ne'ebé hala'o ho komunidadé sira. Iha atausaun sira kona-bá kombaté krime organizadu, iha ASEAN PNTL hetan kontinensia, partikularmente kona-bá kombaté droga. Mezmú iha difikuldade oin-oin ema konsidera Timor-Leste hanesan fatin transit ba droga hodi hakat ba rai sira iha ASEAN, partikularmente tama ba Indonezia. Maibe primeira-ves iha historia rejaun ASEAN Timor-Leste kaptura *precurso* droga ho kuantidade 160 toneladas iha tinan 2018.

⁴³ SSD Fundasaun Mahein (2021, agostu, 24).

⁴⁴ Tatoli, (2019, Agostu, 26) – Governu-PNTL koalía kestaun seguransa no adezaun Timor-Leste ba ASEAN. disponivel iha ne'e; <http://www.tatoli.tl/2019/08/27/governu-pntl-koalia-kestaun-seguransa-no-adezaun-tl-ba-asean/>

⁴⁵ Persepsi ancaman di kawasan asia tenggara: peran ASEAN sebagai primary driving force.

Disponivel iha ne'e;

https://simdos.unud.ac.id/uploads/file_penelitian_1_dir/4f7fb269725bac1851b5b8b48c5c7c39.pdf

Husi esperensia hirak PNTL iha sei mos difikuldade barak ne'ebé sei infrenta husi instituisaun sira setór seguransa hodi hatan ba kompleksidade ameasa iha futuru adezaun ba ASEAN. Kompleksidade ida iha ASEAN maka terorizmu internasionál. Sei Timor-Leste adere ba ASEAN setór seguransa iha kapasidade atu atuaa kompleksidade ameasa hirak ne'e ka lae? Proxemplu kona-bá terorizmu internasionál, kestaun ne'ebé sai preokupasaun iha mundu liu-liu iha rejiaun ASEAN. Iha grupu terorizmu oin-oin ne'ebé ejiste no kuaze iha nasaun sira ASEAN nia akontese ne'ebé sai preokupasaun ba seguransa iha rejiaun. Asuntu terorizmu sai difikuldade ba Timor-Leste liu-liu halo analiza no investigasaun wainhira hasoru ameasa terorizmu akontese. Mezmu fortalese ona instituisaun seguransa hanesan Polisia Sientifika Investigasaun Kriminal (PSIK), Polisia Nasional Timor-Leste (PNTL), FALINTIL- Forsa Defeza Timor-Leste (F-FDTL) ne'ebé hola papel atu hodi prepara ba ida ne'e, maibe sei infrenta hela kapasidade atu halo investigasaun intermus iha esperensia.

Iha sorin seluk, Timor-Leste iha ona lei kona-bá brankamentu kapital no finansiamentu terorizmu maibe seidauk iha lei kona-bá anti terorizmu. Portantu papel sira kona-bá atuaun ba kazu terorizmu iha Konseitu Estratejiku Defeza no Siguransa Nasional ne'ebé define tarefa sira ne'ebé liga ho kombate terorizmu nia. PSIK iha kompetensia atu kombate krime sira ne'ebé grave kompleksu no organizado. Iha PNTL iha seksaun espesifiku ida iha unidade espesial PNTL kona-bá kombate terorizmu no arma explosivu, no durante ne'e simu ona formasaun oin-oin husi autoridade sira ne'ebé hodi responde ba kazu terorizmu inklui misaun F-FDTL nia.

Alende terorizmu internasionál no trafiku droga, nomos preokupasaun ida ba Timor-Leste maka investigasaun hasoru kazu brankamentu kapital. Serake Timor-Leste iha ona kapasidade atu bele trata asuntu ne'e. Brankamentu kapital ne'e problema ida ne'ebé liga ho ema no sistema finansiamentu ne'ebé ejiste no mós kestaun ne'ebé liga ho sistema administrasaun publiku mos. Iha relatoriu husi Ministeriu Publiku nia hato'o katak durante ne'e instituisaun investigadór sira iha difikuldade atu halo investigasaun ba krime organizado sira. Orgaun investigadór sira hanesan Komisaun Aanti Korupsaun (KAK), PSIK, no Ministeriu Publiku, inklui instituisaun intelejensia sira atu responde intermus kapasidade investigasaun nia. En jeralmente bele maibe sei menus esperensia no falta kapasidade teknika atu hare kestaun brankamentu kapital ne'ebé liga ho ema, banku, liu-liu sistema finanseira ne'ebé ejiste, nomos kestaun ne'ebé liga ho sistema administrasaun publiku. Timor-Leste tenke dezenvolve asaun sira iha sistema ne'ebé interligadu atu trata asuntu ne'e ho integradu atu responde ba emeasa ida ne'ebé kompleksu liu iha futuru.⁴⁶

2. Kondisaun seguransa iha fronteira

“Luta foun ida ne'ebé tenke hasoru iha futuru sai membru ASEAN, aban bainhira fronteira nakloke, ema no sasan sei tama fasil, buka servisu kompetetividade ne'ebé sei maka'as ne'e maka sai hanesan dezafiu tamba kondisaun ne'ebé menus no kondisaun fronteira ne'ebé seidauk dezenvolve ho diak”. (Nelson Belo)

Problema ida maka wainhira sai membru ASEAN, signifika katak fronteira mos nakloke entre membru ASEAN sira. Iha ne'ebé nasaun sira iha sudeste Aziátiku ida uluk ne'e ket-

⁴⁶ SSD Fundasaun Mahein (2021, agostu, 24).

ketak maibe sai ona komunidadade ASEAN. Komunidadade ASEAN signifika la'os inklui kestaun soberania maibe asuntu sira ne'ebé liga ho komunidadade nia preokupasaun ne'e, tama iha ASEAN nia preokupasaun. Primeiru kona-bá viza ba populasaun nia. Movimentu entre nasaun membru ASEAN nia sira ba mai la uza ona viza ho tratamentu ida ne'ebé ket-ketak maibe integradu. Komunidadade ASEAN ne'e iha tratamentu espesial wainhira halo viajen iha ASEAN nia laran. ASEAN iha intedementu ida iha sitema servisu imigrasaun nia atu atende nia sidadaun sira ho odamatan ida deit. Ida ne'e bele sai hanesan lisaun ida Timor-Leste husi ASEAN ne'ebé hatudu nia sitema atedementu ida elektroniku no modernu.

Nu'udar membru ASEAN problema ida ne'ebé Timor-Leste sei infrenta maka sei laiha ona fronteira entre nasaun sira ne'e. Ho fronteira ida ne'ebé nakloke ema ho sasan sei tama ho fasil. Entaun Timor-Leste nia vijilansia sira iha guarda fronteira sira ne'e tenke preparadu ba ida ne'e. Iha sitema integradu seguransa nasional kria tratamentu integradu ba iha asaun sira fronteira. Signifika katak ita nia politika no sitema ne'e diak, moderniza ona tuir evolusaun mundial. Sitema digitalizasaun atu halo prosesu ida fasil no evita sitema birokrasia ne'ebé iha possibilidade hamosu korupsaun no nepotizmu iha prosesu atedementu nia. Maibe iha difikuldade iha sitema manual iha Servisu Migrasaun mezmua utiliza ona iha pasaporte elektroniku maibe servisu iha odamatan fronteira nia sei iha atedementu ida manual. Dezafiu ida atu adopta ho sitema elektronika ne'ebé moderna iha ASEAN. Portantu ASEAN ohin lora komunidadade ne'ebé organizadu, iha tratamentu vistu ba membru ASEAN ho sitema elektronika modernu halo tratamentu ida ne'ebé fasil no efektivu.

Iha Lei Seguransa Nasional ne'ebé define sitema ba seguransa nasional Timor-Leste mak Sitema Integradu Seguransa Nasional (SISN), atu trata asuntu sira ne'ebé liga ho seguransa ne'e nia tratamentu ne'e integradu. Exemplu iha fronteira, iha postu fronteira iha ne'ebé ne'e iha UPF, Migrasaun, Alfândega, Kuarentena, Transportes. Entaun ema no sasan ne'ebé tama sai iha fronteira ne'e, iha servisu integradu no servisu publiku estadu ne'e iha neba hotu ona. Kondisaun ida ne'e maka ita iha, oinsa maka atu haree ba iha mundu nia dezvoltamentu. Iha kazu Alfândega nian sitema moderniza ona, iha mundu adopta sitema ida "sistema asycuda" ne'ebé bolu naran "Single Window" ka janela ida deit. Sitema ida nee ajuda hamenus tiha birokrasia sira ne'ebé naruk hodi fó biban ba korupsaun no kobransa ilegal sira. Sitema *single window* ajuda servisu ida ne'ebé efiseinsia no efikasias no bele ajuda movimentu ekonomia no hatama reseita ba estadu. Enkauntu problema iha Servisu Migrasaun maka sei utiliza sitema manual. Por-exemplu ita utiliza ona pasaporte elektronika, maibe sitema iha fronteira, aeroportu no portu, ne'e manual ne'ebé sei la ajuda wainhira tama iha kompleksidade ASEAN.⁴⁷

Hatan ba problema kompleku sira ne'ebé indentifika, Timor-Leste tenke prepara nia-an uluk antes adere ba ASEAN. Liu-liu oinsa tu bele deskobre nia pontu fraku sira liu husi avaliasaun ida. Durante ne'e ASEAN maka halo avaliasaun maibe Timor-Leste rasik lahalo avaliasaun ba nia-an rasik kona-bá prosesu adezaun ba ASEAN. Iha ne'ebé dezafiu prinsipal wainhira sai membru ASEAN ema sei mai servisu iha Timor hanesan laloran, empreza ho trabailadór lokal sira ne'ebé la preparadu didiak sei la hamosu kompetisaun negosiu ida ne'ebé saudavel. Iha potensia boot ba krime transnacional sei

⁴⁷ SSD Fundasaun Mahein (2021, Agostu, 24)

barak, terorista, narkotika no krime organizadu sira seluk sei buras tamba meius tama Timor-Leste fasil, no sei utiliza fragilidade sira hodi haboot nia rede.

3. Rekursu, fasilidade, infraestrutur

Haree ba kompleksidade iha ASEAN no iha tempu hanesan ASEAN muda-an sai tiha Komunitade ASEAN. Nune'e wainhira Timor-Leste tama ASEAN problema sira iha ASEAN sai problema Timor-Leste nia. Timor-Leste iha potencia bele sai fatin subar ba terorista sira, ka transit ba droga, no bele utiliza ba krime organizadu sira seluk ne'ebé akontese iha rejiaun laran. Husi aspetu setór seguransa haree ba kompleksidade rejionál no ameasa krime organizadu, enjeralmente bele maibe hare ba kondisaun sira iha instituisaun sira setor seguransa nia prezisa mellora tan iha instituisaun PNTL no mos instituisaun seguransa sira seluk.

Adere ba ASEAN iha setór seguransa kondisaun ne'ebé ita tenke prepara uluk kondisaun interna. Liga ho atividade relasiona ho asuntu seguransa prezisa tenke seguru uluk. Iha ne'ebé atu hatan ba papel seguransa nia atu halo prevensaun no preparadu atu halo atuaun. Nune'e tenke iha rekursu umanu ne'ebé suficiente ho qualidade atu bele hala'o misaun. PNTL iha ona kondisaun rekursu umanu ne'ebé preparadu maibe seidak maksimu no jestaun iha kolokasaun.

Sistema kontrolu hotu-hotu ne'ebé setor seguransa uza ne'e digitalizasaun. Oinsa maka Timor-Leste sukat nia an ho ASEAN sei laiha kondisaun sira hanesan ne'e. Fasilidade ne'ebé atu apoiu sistema kontolu ne'ebé efetivu no eficiencia. Iha era agora era globalizasaun iha kontrolu sira sistema seguransa medernu no rapidu. ASEAN uza sistema digital hodi halo kontrolu ba setór seguransa. Setór seguransa Timor-Leste nia mós tenke evolui nia desenvolvimento liu politika ne'ebé diak atu desenvolve setór seguransa tuir era globalizasaun nian.

Setór seguransa nia kapasidade alende atu responde ba prevensaun krime no krime organizadu, no mos misaun sira seluk ne'ebé liga ho dezastre naturais ne'ebé liga ho seguransa umanu nia. Iha adezaun ba ASEAN setór seguransa nia preparasaun atu responde ba atividade ASEAN.

Nune'e implikasaun seluk tama ASEAN ba setór seguransa nia maka rekursu umanu, fasilidade no infraestrutur sira. Intermus ba rekursu forsa no seguransa iha PNTL no F-FDTL preparadu atu tama ba ASEAN partikulamente atu atende ba reuniaun sira husi ASEAN. Durante ne'e ofisial sira husi polisia no militar barak maka tuir ona formasaun iha rai liur, barak mak hasai kursu, ba tuir treinamentu porefisonal, no aprende ho nasaun oin-oin, Amerika, ASEAN, Eropa. Esperensia tekniku barak ne'ebé gaina iha forsa CPLP, no gradudu sira hetan formasaun husi nasaun sira ne'ebé ko'alia lian Ingles, bele sai hanesan bukae diak atu Timor-Leste bele loke odmatan ba ASEAN. Responde ba obrigasaun sira ASEAN nia partikulamente enkontru sira ne'ebé sei partisipa. Kestaun maka koordenasaun interna atu jere no koloka rekursu sira ne'e tuir nia fatin.⁴⁸

⁴⁸ Belo, Nelson, Asessor seguransa no politika iha Ministeru Prezidensial Konsellu Ministru, (2021, Agostu, 19), Entrevista pesoal.

Iha dezvoltimentu interna setór seguransa nasional hanesan seguransa interna, defeza nasional no portesaun sivil, durante ne'e mosu dezvoltimentu ida ne'ebé la ikilibradu. Hanesan hatete ona iha inisiu, PNTL no Servisu Migrasaun iha sorin ida iha sistema iha sorin menus rekursu. Dezvoltimentu ida ne'e seidak tuir evolusaun instituisaun polisia global. Iha ne'e kazu kona-bá limitasaun numeru iha PNTL. Iha Servisu Migrasaun falta sistema digitalizasaun atu halo atedementu migrante sira.

Dezvoltimentu PNTL seidak dezvolve nia an tuir evolusaun instituisaun polisia global ne'ebé digitalizadu partikularmente iha area investigasaun kriminal. Iha area globalizasaun agora iha mundu no ASEAN nia laran sistema kontrolu muda ona ba sistema dijitalizasaun. PNTL sei menus iha facilidade mezmu iha rekursu seidak kolokadu tuir area especialidade sira. Nune'e se Timor adere ba ASEAN tenke prepara uluk kondisaun iha rekusu umanu facilidade no infraestrutura ne'ebé responde ba kompleksidade ameasa sira iha futuro. Mezmu tuir Global Police Index, PNTL iha ASEAN iha area prevensaun krime, ordem publiku no polisiamentu komunitariu maibe Timor-Leste infrenta la hanesan ho ASEAN. Iha ASEAN infrenta problema ida ne'ebé level a'as ka krime organizadu, enkuantu iha Timor-Leste PNTL foin hasoru deit problema krime konvensional sira hanesan liga ho servisu, violênsia domestika, arte marsias no demostrasaun ne'ebé latama kategoria iha krime organizadu.⁴⁹

Iha sorin seluk kona-bá hatan ba risku dezastre naturais nia. Iha dezvoltimentu seguransa nasional, Protesaun Sivil durante ne'e "*di anak tirikan*". Kondisaun dezvoltimentu interna kondisaun ida ne'ebé importante atu bele responde iha futuro adezaun ba ASEAN. Iha ne'ebé haree ba ASEAN la forma ho alenadu no iha prinsipiu ASEAN Way ne'ebé iha atu interven ba asuntu domestiku nasaun ida. Maibe nu'udar membru ASEAN problema ne'ebé iha ASEAN problema estadu membru hotu nia. Por-exemplu ida maka oinsa atu responde ba kazu desastre naturais nian. Sai dezafiu se Ró ka Aviasaun sira ne'ebé sirkula iha ASEAN ne'e ida monu tama iha Tasi Timor nia, oinsa Timor-Leste atu responde. Nune'e prezisa dezvoltimentu iha protesaus sivil eleva nia kapasidade atu halo intervensau iha area dezastre naturais.

Mezmu iha dezafiu atu tama ASEAN maibe iha oportunidade ba Timor-Leste atu hadiak diak liutan nia ates atu tama ba ASEAN. Sai membru ASEAN iha oportunidade barak liutan ne'ebé Timor-Leste hetan atu dezvolve instituisaun sira setór seguransa nia.

Konkluzaus

Tama ba ASEAN nu'udar kumprimisiu estadu tuir Konstituisaun no PEDN nomos tama iha programa Governu. Esforsu Governu nia nivel nasional no rejionál no resposta husi ASEAN nia atu hasa'e kapasidade tekniku atu tama ba ASEAN. Iha nivel externa resposta governu nia ba adezaun ASEAN prezisa konserta liutan politika iha nivel kooperasaun bilateral no amizade ba iha estadu sira ASEAN. Iha ne'ebé ASEAN nu'udar vizinu imediata tenke sai prioriedade ba kondisaun hotu iha dezvoltimentu interna nian. Meius ida atu konvense estadu membru ASEAN liu husi luta diplomatiku no envolve sira ba investimentu nasional. Hodi konkretiza prinsipiu sira amizade no kooperasaun iha

⁴⁹ Maria de Souza, Gastão, Servisu Investigasaun Kriminal PNTL (2021, Agostu, 26) – Entrevista Pesoal

politika externa, atu kaer metin ligasaun espesiál ho pais viziñu sira no ho paiz sira iha rejiaun.

Timor-Leste tenke tau atensaun maka'as atu dezenvolve nia kondisaun interna iha aspeitu hotu-hotu liga ho pilar tolu ne'ebé ASEAN iha. Politikamente Timor-Leste preparadu atu sai membru ASEAN bainhira deit, maibe kuandu la preparadu ho kondisaun tekniku sira bele sai obstaklu boot ba dezenvolvimentu nasional iha futuru sai membru ASEAN. Portantu ASEAN iha dezenvolvimentu ida ne'ebé dinamika no la'o iha prosesu ida ne'ebé dook, desde tinan 1967. Dezenvolvimentu iha setor seguransa iha evolui tuir dezenvolvimentu globalizasaun nian hodi responde ba ameasa ne'ebé kompleksu, organizadu no modernu. Obstaklu prinsipal Timor-Leste nia setór seguransa iha kondisaun ne'ebé frajil tebes atu responde ameasa hirak ne'e. Tamba depois sai membru ASEAN sei laiha ona fronteira no movimentu ema no sasan sei fasil tama entre estado membru ASEAN sira, ne'ebé presiza ejije kapasidade atu bele responde, no sistema ida ne'ebé rapidu no fasil ka elektroniku.

Durante ne'e Timor-Leste lakon oportunidade barak atu dezenvolve nia setor seguransa. Iha sistema intergradu seguransa nasional fo kbiit atu bele tratamentu ida ne'ebé integradu. Maibe dezenvolvimentu kondisaun infraestrutura, fasilidade no rekursu umanu sei dook husi espetativa, no dezenvolvimentu institucional ne'ebé la'o durante ne'e laiha balansu. Iha ne'ebé seluk hetan atensaun no balu abandona. Nune'e opsaun hirak ne'e sei tuir mai kestaun ne'ebé tenke hetan atensaun seriu husi Governu atu prepara Timor-Leste ida ne'ebé diak, iha futuru sai kontributór ASEAN no la'os sai obstaklu.

Rekomendasaun

1. Rekomenda ba Ministériu Negosiu Estranjeiru no Kooperasaun fortifika liña koordinasaun interministerial no intensifika asaun kolektiva iha prosesu adezaun ba ASEAN. Koodenasaun ida ho intensivu hodi dezenvolve prespetiva hanesan Timor-Leste nia adezaun ba ASEAN.
2. Rekomenda ba Governu atu loke diskusaun nasional atu define prioridade sira atu elabora nia polítika externa no polítika seguransa nasional. Ministériu Negosiu Estranjeiru, Ministériu Defeza, Ministeriu Interior, ho Parlamentu Nasional nia koordinasaun.
3. Rekomenda ba Ministériu Defeza no Ministériu Interiór atu tau matan ba iha dezenvolvimentu institusaun PNTL no F-FDTL iha rekursu umanu, fasilidade no infraestrutura. Nune'e mos ba Protesaun Sivil ne'ebé nu'udar entidade importante hodi responde krize dezastre naturais.
4. Rekomenda ba Ministériu Negosiu Estranjeiru no Kooperasaun atu fortifika diplomasia ho intensivu ho nasaun sira membru ASEAN. Diplomasia ne'ebé qualidade atu kore objesaun estado membru ASEAN ba Timor-Leste nia adezaun.
5. Timor-Leste tenke kontinua promove reformas nasionais hodi aliña ho diretrizes ASEAN atu hatutan esforsus hotu-hotu atu Timor-Leste sai membru efetivu ho plenu direitu iha ASEAN. Nune'e presiza halo avaliasaun interna ba seguransa nasional tomak atu responde ba ASEAN iha pilar polítika-seguransa.

Bibliografia

- Academia Edu – What does it take to join ASEAN? Disponivel iha ne'e;
https://www.academia.edu/33373196/What_does_it_take_to_join_ASEAN
- Academia Edu, The legal battles of Timor-Leste ASEAN membership application. Diponivel iha ne'e;
https://www.academia.edu/38813789/The_Legal_Battles_of_Timor_Lestes_ASEAN_Membership_Application
- Komunikadu konjunta, Reuniaun Ministru Negosiu Estranejriu ASEAN (2019, Jullu, 31) - Paragrafu 74, Pedidu Timor-Leste atu sai membru ASEAN. Disponivel iha ne'e;
<https://reliefweb.int/sites/reliefweb.int/files/resources/CIRCULATE-Joint-Communique-of-the-52nd-AMM-FINAL.pdf>
- Komunikadu konjunta, Reuniaun Ministru Negosiu Estranjeiru ASEAN (2021, Agostu, 02) –Paragrafu 88, Pedidu Timor-Leste atu sai membru ASEAN. Disponivel iha ne'e;
<https://asean.org/storage/Joint-Communique-of-the-54th-ASEAN-Foreign-Ministers-Meeting-FINAL.pdf>
- Peran Institusi Informal dalam Sektor Keamanan di Timor-Leste disponivel iha ne'e;
<https://s3pi.ums.ac.id/peran-institusi-informal-dalam-sektor-keamanan-di-timor-leste-tahun-2000-2012/>
- Programa VIII Governu Konstitusional, Jullu 2018
- Presepsi ancaman di kawasan asia tenggara: peran ASEAN sebagai primary driving Force. Disponivel iha ne'e;
https://simdos.unud.ac.id/uploads/file_penelitian_1_dir/4f7fb269725bac1851b5b8b48c5c7c39.pdf
- Relatóriu FM (2016, Janeiro, 20) - Esforsu no dezafiu adezaun Timor-Leste ba ASEAN “husi prepetiva pilar politika-seguransa no ekonómiku”. MNL, nú.107. Disponivel iha ne'e; <http://www.fundasaunmahein.org/wp-content/uploads/2016/01/Microsoft-Word-MNL107-ASEAN-FINAL-20012016.pdf>
- Rttl-ep, (2015, Outubro 29) - Debate akademiku kona-bá adezaun ba ASEAN no integrasaun ekonomiku rejional. Disponivel iha ne'e;
<https://www.youtube.com/watch?v=f4NBtq3ILQk>
- Rttl-ep (2021, Maiu, 25) – Debate adezaun Timor-Leste ba ASEAN husi geopolitika rejional. Disponivel iha ne'e;
https://web.facebook.com/watch/live/?v=804293333853182&ref=watch_permalink
- Rttl-ep (2020, Dezembru, 21) - Debate adezaun Timor-Leste ba ASEAN entre Ministeriu Negosiu Estranjeiru no Kooperasaun ho Parlamentu Nasionál. Disponivel iha ne'e
<https://www.youtube.com/watch?v=E6NMjYyRIs0>



Sholeh, Badrus (2013) - Membangun hubungan damai Indonesia dan Timor-Leste: kerjasama negara dan masyarakat sipil.

THE ASEAN Charter, January 2008. Disponivel iha ne'e;

<https://web.archive.org/web/20150923185415/http://www.asean.org/images/2012/publications/ASEAN-Charter.pdf>

Tatoli, (2019, Agostu, 26) – Governu-PNTL koalia kestaun seguransa no adezaun Timor-Leste ba ASEAN. disponivel iha ne'e; <http://www.tatoli.tl/2019/08/27/governu-pntl-koalia-kestaun-seguransa-no-adezaun-tl-ba-asean/>

TVE Timor, Programa futuru diplomatiku (2020, Novembru, 18) – Deonisio Babo, Timor-Leste seidak tama ASEAN tamba fraku iha influnesia no diplomasia. Disponivel iha ne'e; <https://www.youtube.com/watch?v=sO3vMVZna7w>

Tatoli, (Stembru 2019) – Vizita Fact Finding Mission ASEAN mai Timor-Leste foin primeiraves disponivel iha ne'e. <http://www.tatoli.tl/2019/09/27/vizita-fact-finding-mission-asean-mai-timor-leste-foin-primeraves/>

Universitas Kristen Setya Wacana. (2019). Dinamika masuknya Timor-Leste untuk mendapatkan status keanggotaan penuh dalam ASEAN. Disponivel iha ne'e. <https://repository.uksw.edu/handle/123456789/19435>